

Ubur-ubur api biru ancam Pantai Irama

UM 30/1/2022 MS:30

BACHOK: Ubur-ubur api yang berwarna biru atau spesies *physalia physalis* dikesan muncul di kawasan pesisir Pantai Irama di sini sejak beberapa hari lalu susulan fenomena air pasang besar.

Pegawai Angkatan Pertahanan Awam (APM) Daerah Bachok, Leftenan (PA) Mohd. Khairi Mat Hussin berkata, ini merupakan kali pertama pihaknya menemukan ubur-ubur spesies berkenaan.

Menurutnya, kebiasaan APM hanya menemukan ubur-ubur berwarna merah jambu dan putih.

“Anggota APM telah menjalankan tugas mengesan bangkai ubur-ubur yang mungkin terdampar di sepanjang pusat peranginan itu di kawasan tersebut.

“Setakat ini, tiada pengunjung yang dilaporkan terkena racun ubur-ubur itu, namun usaha meningkatkan kesedaran mengenai kewujudan haiwan tersebut telah dijalankan secara berterusan,” katanya ketika ditemui pemberita di sini semalam.

Dalam perkembangan lain, anggota APM melaksanakan pemantauan pada waktu tengah malam terutamanya semasa ombak menghempas kawasan pantai untuk memastikan tiada pengunjung sepanjang fenomena air pasang besar.

Katanya, APM masih menaikkan bendera merah menunjukkan petanda bahaya untuk sebarang kegiatan pantai sejak akhir Oktober tahun lalu hingga hari ini sebagai peringatan kepada pengunjung.

“Keadaan ombak besar dan laut bergelora tidak sesuai untuk sebarang aktiviti laut termasuk mandi pantai dan memancing di atas batu penghadang ombak,” jelasnya.